

Regional News Unit AIR Aizawl
Saturday, March 22, 2025
Time - 7:30 -7:40Hrs

REGIONAL NEWS BULLETIN

HEADLINES (MORNING)

- Kumin chhungin Mizoram hmun hrang hrangah Apex bank Branch 50 hawn belh tum ani tih Apex Bank Ltd. Chairman Pu Lalnunsangan a sawi.
- Bairabi leh Sairang inkar relkawng chu kumin May emaw June thlaah a him leh him loh enchhin a ni dawn tih Northeastern Frontier Railways Divisional Railway Users Consultative Committee ah tarlan a ni.
- Union Home Minister Amit Shah chuan Narendra Modia sawrkarah politics lama tumna nghet tak leh technology hman thiam avangin ram venhimna lam a chak tha tawh tih a sawi.
- Union Agriculture and Farmer Welfare Minister Shivraj Singh Chouhan chuan Digital Agri Mission hnuaiah ramchhung loneitute chu Digital Identity Card pek vek a ni ang tih a sawi.

<><><>

APEX BANK

Mizoram Cooperative Apex Bank Ltd. Chairman Pu Lalnunsangan nimin khan Kolasib a tlawh a, Kolasib District Cooperative Union hruaitute nen, Circuit House Conference Hall-ah Cooperative Society hmasawnna tur chungchangah an inkawm a,

Pu Lalnunsanga chuan kumin chhungin Mizoram hmun hrang hrangah Apex bank Branch 50 hawn belh tum ani tih sawiin, Branch 7 hawn ani tawh a ti a, hei bakah hian Vairengte ah Apex Bank Branch thar hawng turin hmalakna kalpui mek a nih thu a sawi a, he hunah hian Pu Hmangaihzualla, Secretary, KDCU chuan an hmalakna leh Kolasib District a Cooperative Society te dinhmun leh hmalak dan hrang hrang te report a pek bawh.

Hei bakah hian Kolasib Agro Marketing Cooperative Society (KAMCO) ten Dragon fruit an sawngbawlina hmun Kolasib Hmarveng a mi chu Apex Bank Chairman hian tlawhin, Society kal zel dan tur leh hma an sawn theih na tur KAMCO hruaitu te a sawipui bawh.

<><><>

ORAL HEALTH DAY

Health & Family Welfare Dept. hnuaia National Oral Health Programme, NHM, huaihawtin nimin khan Aizawl MINECO ah World Oral Health Day hman a ni a.

Health Minister Pi Lalrinpuiin he hun hi a hmanpui a, Mizoram chhunga District Hospital, Community Health Centres leh Primary Health Centres a Dental OPD te hi mipui ten a theih anga pan taima a hmang tangkai turin chah a. Ka chhung hriselna ngaipawimawh tur leh Mizote Zuk leh hmuam tilo an tam tawh thu te, mi hmaa ding thin Zaithiam leh Sport lam tuimi tam tak pawhin HA fai tak neih an duh tawh thu te a sawi a. A bikin Thalai ten Zuk leh hmuam tih loh inzirtir uar sauh sauh se, Nu leh pate pawhin an fate zuk leh hmuam tilo zel turin zirtir sauh sauh se a ti a ni/

He huna tarlan anih danin, kum 2017 atanga kum 2022 chhung khan Ka chhung Cancer Mizoramah mi 1105 an awm a. Kum 2024 chhunga Sawrkar damdawiin hrang hrang Dental OPD a inentir mi 72,005 an awm a ni.



RAILWAY MEETING

Assam state Lumding-a Northeastern Frontier Railways Divisional Railway Users Consultative Committee nimina neihah Bairabi leh Sairang inkar relkawng chu kumin May emaw June thlaah a him leh him loh enchhin a ni dawn tih tarlan a ni a, Commision of Railway Safety in a endik dawn a ni.

He Committee-a member ni mek Pu Jonathan Lalremruata, OSD to Chief Minister chuan Mizorama Railways hmasawнна tur thil te meeting ah hian a thlen a, hei bakah hian Sairang leh New Delhi inkar chu mihring phur chi Rail changkang Rajdhani Express tlantir ve tha a tih thu OSD to CM hian a thlen a. A rawtna hi Railway HQ lamah thawn an rem ti a. State capital tin hi Rajdhani-a Delhi thlun zawm vek tum a ni a, chuvang chuan Sairang to New Delhi pawh hi tihtheih ve ngei beisei a ni.

Meetinga a thu thlen zingah Railway Reservation center leh Parcel Management Service Sairanga dah ve ngei a rawtna pawh an pawm a, Sairang Station commision hunah tih tur a ruahman a ni.



MANIPUR ISSUE

Aizawla Mizo Zirlai Pawl Pisapui-ah; MZP hruaitute kaihhruaina hnuaiah Hmar Students’ Association (HSA) leh Siamsinpawlp (SSPP) hruaituten nimin khan Joint Meeting an nei a. Manipura Hmar leh Zomi inkar buaina kal zelah, Mizoramah buaina a kan kai zel loh nan leh remna a awm theih nan hmalak ho zel dan tur sawiho a ni.

Meeting hi MZP President H. Lalthianghliman a kaihruai a, hemi chungchanga thuchhuah intawm an siamah Zofate inkarah inpumkhatna a awm theih nan hmalakho zel tha an ti tih an sawi a, Manipur Zofate inkara buaina avanga, Hmar Students’ Association (HSA) ten, Zomi’te tan pawm harsa tak thuchhuah a siam avanga rilru na leh thlabar an awm avangin meeting-ah hian HSA hruaitute chuan mipuite hnenah ngaihdam an dil a. Hemi avanga Siamsinpawlp (SSPP)-in Police station pathum a FIR an lo thehluh tawh chu hnuhdawh an remti bawk.

Nimina Mizo Students Union MSU Meeting chuan Manipur-a Zofate hun tawn mek chungchang ngaihtuahin, boruak tha a awm tawh ni a an hriat thu an sawi a, a chhe zawnga boruak kallova, inremna kawng zawh zawng a boruak a awm tawh avangin an lawm takzet tih an sawi a, tun hnu zelah Zofate inkara inhmuh thiam lohna awm thei lakah mitin fimkhurin a thlen tawh loh nan theihtawp chhuah ni se an ti a ni.

Nimin vek khan Zofa Global Network thuchhuah siamin, buaina chhuak chungchang ngaihtuah hian nizan khan Central Committee Meeting an nei a. Zomi leh Hmar inkara buaina pawl an tih thu sawiin, an inkarah remna awm thuai se a duh tak zet an ti a ni.

<><><>

FOREST MINISTER

Environment Forest & Climate Change Minister Pu Lalthansangan nimin khan Keifangah Tualbung, Sihfa, Dilkhan leh Saitual VC III huam chhunga Balhla leh Lakhuihthei chingtu chhungkaw 106 hnenah Integrated Management Plan hnuaia tanpuina sum fai a hlan.

Pu Lalthansanga chuan,"Kuthnathawktuten eizawnna ngel nghet an neih theih nan Central in project tha tak mai a siam a, chumi bawhzui chuan state sawrkar pawhin hma la nghal a, mizote lo neih dan tam zawk shifting cultivation chu zawi muanga a thlakna ngaihtuah a ni a ti a. Kuthnathawktuten an thawhrim rah an phu ang ngei a an seng theih nan hma an la a, thlai thar hralh chungchangah pawh chak takin hma an la zel a, mipuite pawhin dawhtheihna nen sawrkar hmalakna te an ngaihchan thiam a pawimawh hle a ni, a ti.

IMP hnuaiah hian Tualbung, Sihfa, Dilkhan leh Saitual VC IIII khuate awmin chhungkaw 106 ten he scheme hi an chhawr mek a, khaw thenkhat chuan an pawisa dawn tur hi dawng zo tawhin a then chuan 1st installment an dawng tawh a, 3rd installment lak mai hmabak an awm mek bawk a ni.

<><><>

CONG MLA

Congress MLA, MPCC Vice president Pu C Ngunlianchunga chuan Chief Minister chuan Assembly House-ah Pa ber nih a tlin lo a ti.

Nimina Congress Bavan-a party inkhawmah he thu hi sawiin Pu Ngunlianchunga chuan House Leader chuan mawhphurhna sang tak an nei a, Assembly House ah pa ber chan an chang thin a, opposition te hmaisai chungin kal pawh ni se, house leader chuan a lo ti dai tur a nih laiin ani chuan a lo tihsat belh emaw tih tur a ni a ti a, ama chungchang pawh kalphung pangngaiah chuan faten thil an ti dik lo a nih chuan pindanah an ko a, i thil tih hi a dik lo tiin an zilh thin a, khawtlangah mualpho takin an aupui ngai lo a, Chief Minister pawhin chutiang chuan ti se, mipuitling zia a ni tur a ni a ti.

Assembly house ah MNF member te an ti khawngaihthlak a tih thu sawi bawkin zawhna an zawh pawhin an zawhna chhang lovin a zawttute an chirhtheh chiam zel a, hetianga chetna hi a parliamentary lo a, a zahthlak hle a ni, a ti.

Pu Ngunlianchunga chuan Sawhthing chungchangah ZPM sorkar chu demin, February ni 20 atangin sorkarin kan lei dawn an tih avangin kuthnathawhktu ten an cho ve a, an lei leh ta mang si lova, kutthnathawktute an khawngaihthlak takzet a ni a ti.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.
Vawiin chawhnu dar 2 leh a chanve-ah Chanchinthar puan leh a ni ang.



UNION HM

Union Home Minister Amit Shah chuan Narendra Modia sawrkarah politics lama tumna ngeth tak leh technology hman thiam avangin ram venhimna lam a chak tha tawh tih a sawi. Nimina Rajya Sabha-a Union Home Ministry hnathawh dan chungchang sawihonaah he thu hi sawiin NDA sawrkar chuan firfiakte lakah ngaihnathiamna a neih loh thu a sawi.
Union Home Minister Amit Shah-a chuan NDA sawrkar chhungin Jammu & Kashmir-ah firfiak chetna avanga thihna chu zaa 70 in a tlahniam tih a sawi a. Pu Shaha chuan J&K ah hian firfiakte chetna pawh a tlahniam nasa hle a ti a.. Kum 10 chhungin ramchhung venhimna lam nasa taka thuamchak a nih thu a sawi a ni.



UNION AGRI

Union Agriculture and Farmer Welfare Minister Shivraj Singh Chouhan chuan Digital Agri Mission hnuaiah ramchhung loneitute chu Digital Identity Card pek vek a ni ang tih a sawi. Lok Sabha-a zawhna chhangin he hmalakna avang hian loneitute chuan sawrkar scheme hrang hrangte an dawng thei dawn tih a sawi a. Pradhan Mantri Fasal Bima Yojana scheme chuan khuarel chhiatna avanga thlai hlohna tam tak a veng dawn tih a sawi bawh a ni.



TB

Kumina chhung ngeia TB umbo turin sawrkar chuan chak takin hma a la mek. Unin Minister of State for Health Anupriya Patel chuan Lok Sabha inkhawmah he thu hi sawiin TB vei zat hi zaa 17.7 laiin a tlahniam tawh a ti a. Kum 2015 ah TB vei mi nuai 1 zela 237 ni thin chu kum 2023 ah chuan 195 ah a tlahniam tawh tih a sawi a. TB avanga thi zat pawh kum 2015 aiin 2023 ah chuan zaa 21 in a tlahniam tawh tih a sawi a ni.

